

Rosario ba Martiri Missionariu

Komentariu: Tempu kuarezma, mak ita simu bolun atu harohan, jejun no halo karidade. Tinan-tinan iha loron 24 fulan Marsu nian ita halo orasaun no jejun hodi oferese ba maun alin mártir misionariu sira, ne'ebé saran sira nia moris tan haklaken Evanjelu. Tema ne'ebé hili ba loron ida ne'e mak "**imi sei sai Ha'u nia sasin**". Loron ne'e mós loron mártir misionáriu sira nian ne'ebé tebes duni fó sasin ba Jezús to'o ema persegue sira, fakar ran tanba defende fiar sarani maibé sira ho aten brani nafatin ba tama iha fatin oin-oin no iha kultura oin-oin, liu-liu iha fatin hirak ne'ebé ladauk hatene no koñese sé mak Jezús Kristu. Ho ne'e mai ita harohan atu fini fiar sarani nian, ne'ebé mártir misionáriu sira kuda iha sira no sasin moris nian bele sai buras iha rai misaun, liu-liu iha fatin hirak ne'ebé oras ne'e daudaun hasoru perseguaun oin-oin.

Prepara ambiente

Kruz, Biblia, Globe, Lilin (Lilin 5 tuir kontinente ida-idak no oferese kada mistériu ida-idak).

Hodi Padre...

Gloria ba Padre ba Filho...

Hahu ho kanto

**O Maria, Rainha das Missoes,
Dai-nos muitos e santos missionarios!
Dai-nos muitos e santos missionarios !**

Mistériu Dolorozu

Mistériu 1: Jezús halo orasaun iha to'os Oliveira molok atu saran-An ba mate (Luk. 22;43-44)

Kor matak: oferese lilin kor matak reprezenta kontinente Afrika.

G 1: Molok ema atu saran Jezús ba mate, Nia ba iha to'os Oliveira hodi halo orasaun. Iha momentu ne'ebá, Nia rasik sente katak, terus ne'ebé mak Nia sei simu, todan resin. Tanba ne'e Nia harohan: "Aman bele karik, hado'ok tiha kálise ne'e hosi Ha'u, maibe la'os halo tuir Ha'u nia hakarak maibe ita nia hakarak. Maske Na'I Jezús hasoru terus, Nia fiel nafatin ba Aman Maromak tan de'it atu realiza misaun hodi salva ita ema.

G2: Ami harohan ba sarani iha kontinente Afrika, ba sira ne'ebé mak sofre tan kiak, mukit, hamlaha, funu no sira ne'ebé hamro'ok atu hetan moris. Haraik ba sira forsa/kbiit, laran manas, atu sira fiel nafatin ba fiar sarani ne'ebé mártir misionariu sira kuda hela iha sira.

Ami Aman Hananu, Ave Maria ho lian português reza. Gloria....

Mistériu 2: Ema Judeu sira kaer Jezús no baku Nia to'o kanek (João 19:1)

Kor mean: oferese lilin kor mean reprezenta kontinente Amérika

G1: Figura Pilatus nian reprezenta ema ne'ebé laiha responsabilidade ba moris. Nia ne'ebé iha poder atu defende moris, fase liman atu keta simu konsekuensia. Di'ak liu ba nia atu aseita situasaun ne'ebé la justu duke lakon nia pozisaun ka poder. Barabas nia liberdade hatudu mós katak iha sosiedade, kriminosu sira kontinua livre hodi hala'o nia aksaun, maibé ema ki'ik, kiak no simples dala barak sai nu'udar vitima hosi poder injustu.

G2: Ami harohan ba sarani sira iha kontinente Amerika, atu sira nakonu ho Espíritu Santu bele koñese didi'ak Ita Oan Jezús Kristu, liu-liu iha ninia misteriu terus nian. Atu ita nia sarani sira iha Amerika bele hasoru Jezús ne'ebé moris, nu'udar dalan ba unidade, fraternidade no solidaridade iha sira ida-idak, iha sosiedade no iha NASAUN.

Ami Aman, Ave Maria ho lian tetun. Gloria

Misteriu 3: Ema leu ai-tarak ida hodi tau iha Jezús nia ulun (Mat. 27:28-29).

Kor mutin: oferese lilin kor mutin reprezenta kontinente Europa

G1: *Ema a'at sira hamoe Jezús hodi leu ai-tarak tau iha Nia ulun. Sira kuprimenta Jezús nu'udar liurai maibé la'os buat ne'ebé sinxeru hosi fuan, basá sira hakarak duni hamoe Jezús ho dalan oin-oin. Ida ne'e mak atitude hosi ema sira ne'ebé lahatene respeita nia dignidade rasik, hodi buka halo terus ema seluk.*

G2. Ami harohan ba sarani sira iha kontinente Europa, atu ho aten brani hamoris no haklaken ahi fiar sarani nian ne'ebé mártir missináriu sira sosa ho sira ran rasik.

Ami Aman, Ave Maria hananu. Gloria

Misteriu 4: Jezús lori nia krus hodi la'o ba kalváriu (Jo 19:17)

Kor kinur: oferese lilin kor kinur reprezenta kontinente Asia

G1. *Iha Jezús nia tempu, mate iha krus nu'udar forma kastigu nian ida ne'ebé mak sei hatuun de'it ba ema kriminozu sira. Maibé, Jezús simu terus iha krus, maske laiha sala ida ne'ebé Nia komete.*

G2. Ami harohan ba sarani sira iha kontinente Asia, ne'ebé hetan problema oin-oin iha sira nia moris, ne'ebé laiha hela fatin, ekonomikamente hetan situasaun a'at liu, tradisaun no moral, la rekoñese sira nia direitu umanu. Haraik ba sira forsa, laran manas, atu sira nafatin fiel no metin iha fiar ne'ebé mártir misionáriu kuda hela iha sira nia fuan.

Ami Aman... Ave Maria reza lian Ingles, Gloria

Misteriu 5: Ema haterus Jezús to'o mate iha krus atu mundu nia salan (Luk. 23:46)

Kor Azul: oferese lilin kor azul reprezenta kontinente Oseania

G1: *Dalan terus Jezús nian to'o duni rohan, "Nia mate iha krus". Jezús salva nia umanidade tomak konkretiza duni liu husi ninia mate iha krus, atu umanidade bele hetan moris foun hosi Nia.*

G2: Ami harohan ba sarani sira kontinente Oseania. Atu sira ne'ebé hetan persegisaun tanba sira nia fiar, atu Na'i haraik kbi'it no konsolasau. No ba mártir ne'ebé defende fiar no mate tan ema oho sira iha kontinente Oseania durante funu mundial daruak nian, atu fini fiar nian ne'ebé sira kuda hela buras kontinua ba bei-beik. Tulun nafatin sarani sira atu fiel hodi moris turir vokasaun nu'udar Kristu nia dixipulu, maski tenke terus wain tanba sira nia fiar.

Ami Aman, Ave Maria lian Indonesia. Gloria

Ita kontinua reza ba paz iha mundu liu-liu ba nasaun sira ne'ebé oras ne'e daudaun hetan konflitu oin-oin tan funu, dezastre naturais no seluk tan.

Reza Ave Maria 3 atu protesaun Ita Na'in Feto nian sira bele sai ema livre hodi hadook husi ambisaun mundu nian.

Kantu HBN 370

Maria Sarani sira nia tulun, harohan mai ami.

Hodi padre....